


少華稿
七

記題跋

六十五

EAST ASIAN LIBRARY
KOREAN COLLECTION
COLUMBIA UNIVERSITY
NEW YORK, N. Y. 10027





RARE

BOOK

Chip

2 10

V. 7

~~T~~
~~3651~~
~~N15~~
~~V. 7~~

雷淵集卷之十三目錄

題跋

秋水圖跋

題吳伯玉

璦

遊鐘巖詩卷後

題伯氏漁父圖小詞後

簡牘小卷跋

百拙稿後跋

太華贈李文遠

德弘

詩軸題

書沈存中筆譚後

書右軍筆佛經後

題禹司藝

世準

占易說後

自庵大筆跋

題太華送俞子章

郁基

東歸帖後

伯玉詩集跋

書清驪軸後

題虛舟畫屏六帖

鐘巖詩卷跋

李平一

衡萬

麻湖錄跋

俞侍讀

宇基

西南二遊錄跋

東律家選跋

閔徵士士元

遇洙

書壽母小屏識

臨溪百詩跋

文憲公手書詩卷跋

臨齋遺墨小屏識

蠟菊歌三疊跋

涓社重九詩跋

書亡兒零葉

太華手書大學帖跋

五老書瀛洛詩小屏跋

尹季章

鳳五

五老會圖題

華陽先生手簡跋

陶谷五世譜跋

題趙學士景瑞玻四木圖說後

記

遊玉流洞記

二松園記

遊西湖記

聾瞽窩記

宋徽宗畫記


毛將軍畫記

壽侯廟記

逸民南公畫像記

景陶庵記

三菴齋記



雷淵集卷之十三

題跋

秋水圖跋

辛丑

余有古畫一幅不知何人作也然余嘗居江湖知此畫之妙也其大魚躍小魚泳秋水初落而有出渚之尊蘆葦方深而有緣岸之蟹此余之其樂乎江湖而不能與人言者也每觀此圖悠然以喜悵然以思洋洋有秋風吳會之興而又恨天下有知余樂者而余顧不得見也歲暮矣安得携女浮于江羹其尊而鱸其魚垂袖徜徉於渚葦之間也姑為識

題吳伯玉

一 媛

遊鐘巖詩卷後

甲辰

昔者之遊吾已忘之矣今也之遊吾固不與也今吾見此卷荷香水聲藪藪乎吾鼻而潺潺乎吾耳蒼槐之下見吾馬之繫也白石之濱聽我友之歌也吾不與遊而參於前者如是豈非昔者之遊闇然在懷而諸公今日之作有以發吾之機歟夫不同今日之遊而能言諸公之樂者惟吾能然遂題其卷末

題伯氏漁父圖小詞後

丙午

漁父圖者少華所寫也太華子為之贊曰水漫漫而波雲漠漠而雨木蕭蕭而寒山蒼蒼

而暮有一漁父投竿于其流橫舟于其渡深
蒨覆頂長蓑過股淵然若睡穹然若俯魚泳
于深彼哉何慕丙午秋日題于清風亭

漁父夜釣于西巖之下古木之濱太華子窺戶而見
之投之以詩漁父怒拏舟俛首而去遇少華子少華
子曰女何不藏女形晦女光而數數於人間也夫太
華子文章必傳於世世之人將以太華子之言踵女
於西巖之下古木之濱女將惡乎逃焉漁父不能對
少華子解之曰女毋患焉女今而後大逃焉太史慈
與孫策戰孫策走太史慈追將及孫策取其兜子投

之西山從東山走太史慈以為孫策走西山追之卒
不獲永之人逐蛇蛇入于穴永之人壞其穴以石急
擊之則蛇蛻也已無蛇矣女未嘗知太華子太華子
亦未嘗名女特以漁父稱漁父天下獨女乎哉太華
子所見者適女也人之求女亦以為太華子所見者
漁父而已未嘗以為女也然女則果女也猶永之人
未必憎是蛇也是蛇則是蛇也女惡乎免焉女曷不
鬻女之舟為牛操女之竿為鞭去女之江湖而遊乎
隴陌豐草之間人將以女為牧豎不以漁父稱也女
又胡不舍其竿而腰其鐮何不破女之揖以為負薪

之器行歌于南山之中人之遇女者以女為南山之
樵老也不以為西巖之漁父也如此太華子之所見
者則女之堯子也人之所求者則女之蛇蛻也女因
而逃焉不亦可乎是女以西巖之漁父存女於無而
卒以南山之樵老脫女於有也是女之名幻於外而
女則自若也名者實之賓於女何有哉故曰至人無
名女以為奚若漁父笑曰諾夫子教我矣遂去不復
見

余童時嗜畫類王猷之於竹也聞人家有好畫必
往求觀焉鄰居趙君滄江之孫而滄江善畫故畜

古畫甚多余嘗見安堅李損畫人物尤絕好日往
求觀主人或厭之而余則愈不厭也槎川李公喈
畫甚與河陽監鄭君散遊鄭君善為畫李公得古
畫必問於鄭君鄭君曰善然後畜之故李公不知
畫而得好畫最多余所見者障子五十餘軸帖數
卷而畫家之能事盡在斯矣於是嗜之愈甚其後
客大堤大堤踰多能畫者與之居數月觀其畫山
水石木人物無不具率不見奇也已而悉取其所
畫與人家不留一也乃歎曰畫之為技至細也而
今世又無能者焉不如且已也罷去數日意猶未

已輒復曰今之人皆不如古人今之文皆不如古
文未聞以不如古而廢人與文獨盡乎我於是不聞
戶謝客自作水墨大小累十紙如是者數日而率
不及大堤人之所為也人之善畫者必用細筆然
後盡其能而余必用大筆人以淡墨而余以濃墨
人之善畫者必徐徐動筆欲其妍且工也余奮筆
直遂惟意之所往一日作八九紙而日有餘力是
皆畫家大忌而余皆犯之宜其不能畫也方其畫
也泰山在其前大海經其後草木鳥獸雲烟風月
四時朝暮之變態莫不參錯乎目前而洞盪乎胸

中及其行墨也昔之經營乎意中者無一二彷彿
矣大堤人之不善畫也手有餘而意不足也余之
不能畫也意太奇而手不從也是知古人之善畫
也心與手應而已伯氏嘗見余漁父圖亟稱之迷
短詞一篇題其首而還之伯氏之不知畫也雖其
文辭之美何以使吾畫增價也雖然不見吾畫而
讀伯氏之文者將謂余能畫殊可愧也遂書其左
文多滑稽然亦以微見其志耳

簡牘小卷跋

余既畜前輩長者手簡為一二軸又取昆弟朋友往

復之書合為二卷大札小札無遺焉精書麤書無擇也詩句唱酬者有之俚辭詼諧者附焉或曰子之事不已夸乎余笑曰人不可常聚也必有時而散散而不相見則思思之甚而又不可見則必藉咫尺之書以通其意其意既通則雖千里之遠猶一室之內矣可不貴歟且使為是書者他日各有德業文章其手澤皆可愛而子孫又不至不肖則世世而寶之錦其卷而瓊其籤可也苟其人不乏貴而書亦不乏寶也則雖塗其壁而覆其罍亦不恤也此皆非吾所能知也然亦足相勗也夫既而書其說于卷末

百拙稿後跋

丁未

才難徧長徧長不工不工孰以徧長稱哉此遊藝家
所大懼也文遠用詞賦試舉子業屢不準於一夫之
目既而發憤為詩隱然以古名家為的不至將不措
也余則不能詩矣伯氏之長于詩又于詩寡與而推
褒期望之至此隆也

伯氏嘗為其小跋

文遠之詩得此而增

其價駁駁有千里之聲焉吾將見操壁以求良馬者
舉集於文遠之門矣雖然竊嘗聞之紀昌之學射也
懸虱總間朝暮而視之如車輪之大然後成其技項
籍之學兵也學書不成學劍又不成去乃學萬人敵

雖甚雄矣卒無成功故業不專則功不成紀昌之射
由專而工者也文遠尚念之擇能而居之專精以治
之勿以聲譽而惰其志不以厄窮而遷其業則吾將
見烏牛脊毛落於百步之一矢矣盍亦勉之哉

太華贈李文遠

德弘

詩軸題

蟬噪秋風滿洛城故園雲物待君行遙知兄
弟連牀地麥食無魚意更平

右太華送文遠歸田之詩也何其言之使吾悲也始
吾與太華朝暮食必連牀得一味雖少必相讓不如
是其食不能甘也人皆有兄弟之樂惟貧然後其樂

乃見富人兄弟稍長輒異產衣食自其家辦相勝而耻不如雖有麥食蔬羹固不樂也文遠家甚貧兄弟五人群居一室式好而無猶太華之為是言其不誣也已酉四月辛卯夜閱文遠詩箱得此讀之相與執手一慟書其下以還之嗚呼惟文遠能知余之悲矣

文遠新亡其伯氏

書沈存中筆譚後

取辨高唐賦一節○庚戌

自古言楚襄王夢與神女遇以楚辭考之似未然高唐賦序云昔者先王嘗遊高唐夢見一婦人曰妾巫山之女也

云云

則其曰先王者

懷王也非襄王也又神女賦序曰楚襄王與
宋玉遊於雲夢之浦使玉賦高唐之事其夜
王夢與神女遇王異之明日以白玉玉曰其
夢若何王對曰晡夕之後云云玉曰狀如何也

王曰茂矣美矣

云云

王曰若此盛矣試為寡人

賦之所謂茂矣美矣果王之言則宋玉稱讚
之可也不當又云王曰若此盛矣又人君與
其臣語不當稱白不當稱對又其賦曰他人
莫覩王覽其狀望余帷而延視兮若流波之
將瀾若宋玉為王賦之如王之自言者則不

當自云他人莫覩王覽其狀既稱王則是宋
玉之言也又不稱稱余者誰也以此考之則
其夜王夢與神女遇者王字迺玉字耳明日
以白玉者以白王也此下王曰者王也王對
曰者王對曰也狀如何
也者王問也茂矣
羨矣者王對也玉字與王字倒書之也前
日夢神女者懷王也其夜夢神女者宋玉也
王覽其狀亦當作王覽
其狀余即宋玉自言也襄王無與焉從來枉
受其名耳

宋玉一賦而遺醜於二君沈氏片言而破疑於千古
嗚呼使楚王父子之倫夫婦之位得免於禽獸之域

者非沈氏力乎語功於楚固不在孫叔敖之下矣嗟
夫聖賢之書亦豈無錯簡註字惟其義理之所寓者
至大至廣而有非半句隻字所能掩故諸儒之臆說
亂解不勝其繁而卒不能誣其真此所以為聖賢之
言也今宋玉之賦所爭持一點之誤耳其害遂至於
恃倫賊義千百載下受人醜穢而卒無以自解豈非
徒務詞華不尚義理之禍哉微沈氏殆乎其難免矣
此一事也有足為省書者之法作文者之戒書以識
焉

書右軍筆佛經後

辛亥

聖人之書其可貴在內不以外然亦有悅於外而勉求其內者噫聖書之不講久矣晉之時尤甚崇虛以戒實義之乎胡不書大學一卷而顧俯首為此也余斯有感焉

題禹司藝

世準

占易說後

國子司藝禹公世準明於易為余推命得觀之上九觀之上九君子之為一世望者可以當之非余所堪然若其受辭所謂觀其生君子無咎則庶幾持以自勉焉癸丑四月日少華道人書于泮水東村

自庵大筆跋

右自庵金文簡公手寫靜裏天大閒中日長八大字
癸丑六月甲子夜與俞子章共觀之因輟而贈之為
題其後此語殊似無味却甚有味天下知其有味者
蓋鮮雖自庵未必能知之吾伯氏士雅有言烏帽束
帶騶呼控道者不足與語天之大也尊尊為利顧妻
子說有無者不足與語日之長也其言甚妙余閒居
南野遇清和日輒挈一壺陟崔嵬跂石而坐流目遠
眺雲烟之舒卷林樹之動靜鳥獸之飛走鳴蹕魚鼈
之浮潛散合變態百千不離吾几席之間區以別之
則雲烟林樹鳥獸之樂屬乎山魚鼈之樂屬乎水合

以一之則雲烟林樹鳥獸之能舒卷動靜飛走鳴蹄
于山魚鼈之能浮潛散合於水吾之所以優遊自適
乎山水之間而與萬物同其樂者蓋皆得乎天而然
耳是以知天之大大也悠然自酌陶然以醉不知夫舒
卷動靜飛走鳴蹄浮潛散合者果各有其樂而知吾
之樂吾樂否彼之自樂其樂而不知吾之樂亦猶吾
之能樂吾樂而不知彼之樂否思之不獲曲肱以睡
俄然覺則耳目之所聞見者固自若也而吾之樂又
無窮矣既而雲歸山鳥獸羣林魚鼈沉于水而吾亦
負榮詠歌徐步而歸則夕陽猶在藩籬之下矣是以

知日之長也昔梅福遇一道人為畫華山約與俱隱
後福將行友人來別福以畫贈之曰此路吾已熟今
以與子子能躡我乎今余之以此書遺子章亦此意
也歟

題太華送俞子章

郁基

東歸帖後

太華平生無嗜好獨喜遊山水其自閬南歸也當世
之意日益踈而丘壑之計日益急矣就帖中數詩亦
足觀其志然若其悲咤感慨不能自己者當為知者
道不可與俗人言也

詩后六年家大人出宰清風余獲侍杖屨探龜島之

勝窺石門窮仙巖陟月嶽臨水門舟楫驢筇之所至
子章未嘗不以烏巾野服為江山主人而太華之墓
草于今五宿矣嗚呼悲哉余之悲太華固不待山水
然思其人不可見見其人之所欲見者則余之悲宜
益切矣又書

退之有言曰元賓既沒而其言益可貴重為子章別
者非無他人今獨存太華詩於帖中者亦退之之意
爾又書

伯玉詩集跋

甲寅

伯玉之詩以趣勝及其得於心而形諸言也閤然自

有其章鏗然自有其聲外此而詩者伯玉之所不屑也余始未嘗淺之知伯玉而今讀其詩而得其人尤加詳凡以文章自喜者每患先有意於詞而夸心矜氣以臨之啣毫繹思務窮其新奇以上人夫豈不爛人耳目哉將以是求其人則不獲焉伯玉之為詩其意固不在詩故凡有愉佚悲愁觸乎境而感乎情者直假其聲而發之適愜則已耳絕不以陶鎔藻績為能故其詩舒和澹蕩優遊而不迫雖不暇於鳴玉趨步之節而已自有舞雩詠歸之興矣非其真不剝其精不撓自信乎內而無惑乎外者庸能及此乎余久

不見伯玉而見其詩則如見伯玉他日對伯玉眉宇則又其詩存焉是伯玉與其詩未嘗不在吾目中也詎不重可喜歟遂書其稿末

書清驪軸後

丹丘以下其山水蒼峭秀發如蘇子瞻黃驪之間蘊藉平遠如歐陽永叔余自屏山放舟至清心樓下其間五日起居飲食未嘗不與二公接寧不竒哉蓋余之得乎山林者神也其流而峙者跡耳顧何足云高拱舵樓時引數盃嗒然不復為詩無恠乎子翊之怪之也遂書其軸

題虛舟畫屏六帖

為公弼作
○丁巳

琴既張矣胡按指而不彈鶴既矯矣胡歛翮而不翔
吾知山水清冷之韻雲霞高潔之標已入琴心鶴臆
一疊

捧壺兒捧壺莫躡梯梯傾酒墮地携驢兒携驢莫着
鞭鞭動泥濺衣
二疊

試問汝使汝作畫裏人將為山中騎驢子村南敗魚
客抑為松下高冠老橋畔短蓑翁汝將對曰四者吾
匪願願作洲前鷺返照在山烟翠渾江飛息自如玉
舉雲眇
三疊

幽幽竹樹草草風亭有四老偶立而語其三人曰盍
歸乎樵歸于村僧歸于寺主人曰竹林之東爰有新
亭願與客一遊于時風瀑喧飈吾見其人不聞其語
蓋江干漁父聞而言于余

四疊

石棧扶策何如安坐彈匣中琴烟江放纜何如高枕
看霜後楓問諸漁父漁父不答把竿乘流悠然而逝
五疊

漁父漁父爾魚維何我魚伊鱣今夜月明我有斗酒
以爾舟去言涉卽友彼雪岸停馬是吾南院友跨驢
石橋畔是吾北崦丈人丈人先歸期我峯顛雲裏寺

六疊

鐘巖詩卷跋

余平生不喜為詩宜叔伯玉雖為詩而亦未嘗自好
斯集之作蓋偶然爾然觀者或因此而疑吾三人嗜
詩甚可愧也自今吾且閉口不言詩有求之者將應
之曰盈天下者皆吾詩也其常在山川草木其變在
風雲烟月子其往求之丁巳六月庚戌書于雷淵堂

李平一

衡萬

麻湖錄跋

壬戌

子瞻之言曰客亦知夫水與月乎且使吹簫客答之
曰我簫不離口飛響白雲去試看月下川月停水不

住且着潭中月水住月不歇川潭一是水動靜非二
月子瞻必大笑而風月聲色之累脫然去乎胸中矣
今觀麻江詩文平一頗以遊自快宜叔以不得遊為
恨是皆粗跡耳又安知流止皆水而動靜一月乎余
亦有鷗湖之泛矣始以無月為戚終以得月為喜若
是者得無為平一所笑乎盈虛往復之理知者或鮮
矣吹簫客之不答安知不高於子瞻乎鷗湖去麻江
一棹可至惜不邂逅於蒹葭白鳥之間一商此案也

俞侍讀

字基

西南二遊錄跋

甲子

嘗記全唐小史文宗謂學士李石曰卿亦能詩乎對

曰臣不能詩獨喜論古詩如人生不滿百常懷千歲
憂畏不遇時也晝短苦夜長憂治日少而亂日多也
何不秉燭遊勸人主明德以照之也詩如是足矣文
宗為之改容知石之以詩諫也今讀俞丈詩愈出愈
肆累百篇不窮斯可謂富矣清新澹泊詞直而意全
斯可謂工矣然俞丈之出入侍從幾年矣有除輒讓
閨門養高及其奉使西南也補外而西也擁厨傳撰
女樂一觴一詠以取快一時而已則雖其詩之富且
工獨不愧於李石之一言乎余於俞丈愛之篤望之
深故聊復妄發俞丈見之得無以為迂乎

東律家選跋

詩之有律猶樂之有琴其為助於陶寫情志者最切而約故作者多用力於斯而選詩之家朱黃亦爛然矣東人尤尚聲律閭靡競奇不勝其汙漫而選法從而亂焉欲多則濫竿欲簡則遺珠患在雜取諸家而採擇寡術也乃者家大人以耆秩閒居間取東人詩集以諷詠之仍慨然有志於刪述得卓然為名家者二十人近體五七言各若干首第其世次而彙編之高麗則自益齋至圃隱凡五家國朝則起佔畢迄三淵為十五家通得一千九百四十首富矣我夫上

下六七百年而僅得二十家則可謂約矣就二十家而所取幾二千首則不亦博乎惟其約故辨別取舍之例不賄惟其博故賦興正變之體咸具而諸家之長技詩人之能事盡於斯矣且是二十家者或蜚聲館閣或樂道丘壑或忠義軒天地或名論耀一世其盛衰之時窮達之命人各不同則其愉怡舒樂憂悵怨憤之寓諸詩者蓋千百其情而一切叢萃乎是編鏗鏘之韻幽眇之思殆令覽者各隨其境而助其情則是編之為用豈止於啁啾月露而已哉獨麗代名家其全集之見存者無幾其選大遜於國朝是可

惜也編成目之曰東律家選小子竊受而卒業焉歎其擇之精而用之周可為學詩者典刑敬識其末如此

閔徵士士元

遇洙

書壽母小屏識

為閔弟興之作

昔者興之先大夫掌令先生事大母母以善養志聞親戚之貧者歸之如家一芥不以不義取既官于朝不苟進故先生故世卿大家而其貧如寒士君子以為難然余則謂先生固賢矣向非二夫人之賢有以助之何能及此先生既歿興之以國舅嗣孫甫弱冠而受一命興之之賢克類先生然學未優而仕其憂

不在貧而在學興之之母余之姑母而有古賢母之風其所以助興之為善者必如二夫人之於先生也他日興之之養雖極其甘脆苟不以道義將之何足以悅其心興之勉乎哉十一月二十七日乃姑母生朝而興之仲父徵士君為書晦翁壽母詩以遺之意蓋在斯乎意蓋在斯乎余故題其尾以發之

臨溪百詩跋

戊辰

夫我何器也鐘磬也鐘磬也者叩之則鳴不叩則雖終歲不鳴可也昔者太華叩之則鳴月谷叩之則鳴二子者亡而吾之不鳴久矣徃徃村夫街童執筵而

撞之吾亦不能不微響然皆非所謂鳴也從子公弼
與其友吳敬父遊鐘巖會者十人合得詩百篇歸而
示余舒卷未竟吾之鐘磬鉤鉤乎欲鳴夫何故也昔
榮子好舞鶴舞之必自歌榮子死鶴三年不舞久之
其子負薪而吟翩翩然乃舞晏子聞之曰是氣類故
也今吾之欲鳴亦猶是也乎夫是篇也乃吾鳴不鳴
之機也其率使吾大鳴也由汝使吾不鳴也由汝汝
盍志之哉戊辰六月日少華病夫書于靜白堂

文憲公手書詩卷跋

庚午

先君子常言先祖手寫東槎詩帖子者吾少也尚見

之今亡之語至輒愀然余固耳習焉庚午夏余居先
君子憂西江金僉知光弼來吊仍言吾隣有姜文望
者沽一故帖子於藥肆將毀而塗其室有書生識之
曰此壺谷書也姜固武人不知書而習聞壺谷之名
故新其粧深其儲不復以示人也余驚且喜因金寄
語于姜求見焉翌日姜肯袖以至果文憲公手筆而
書東槎五七律并雜詩若干篇題曰睡餘漫筆嗚呼
此為先君子所常言而愀然者其無疑也書之年庚
申也去今七十有一年而其亡不知在何年則自亡
至獲不詳其幾年也又不知閱幾人而復歸乎余也

物之合散興廢其果有數存焉耶遂以綿楮五束易之既陳于廟退又垂涕而記之

臨齋遺墨小屏識

臨齋尹景平既歿踰月其從弟敬以得遺墨於壁間思至則仰而視俯而泣尋又綴之為小屏謂余臨齋友也俾識其左嗚呼思其人而不見則悲見其心畫而如見其人則悲敬以之悲其無已時也夫臨齋博雅之學清修之操足以師範一代筆札小藝固不論其工不工也然余獨喜其結構端方意態清逸雖酒間戲草絕無流瀉之失甚類其為人又所書古人語

蓋皆自託已志反復吟諷悅焉若聯襟而吐話也摩
挲久之不覺涕漻漻下也嗚呼斯世斯人何處得來
甲戌季夏識

蠟菊歌三疊跋

乙亥

先君子姊妹六人相友愛如一人閨門之樂怡怡如
也丙申冬先君子久疾新愈夜輒無睡伯姑母澍人
以蠟菊一盆自製小詞以遺之先君子置諸壁間夜
輒秉燭照其影為長短疎密之勢往往發笑忘睡而
得睡者屢矣既作歌以答之徃復至三疊而余兄弟
及外兄李汝喬奉而和之伯氏又手寫為小帖使衆

兒女歌焉今亡之矣乙亥人日之夜余聞內舍有為
此歌者問之李氏妹之女學於其母而為之也嗚呼
其母也始學此歌猶笄也今老白首矣而又傳其聲
於其女然聞其聲而知為此歌者獨余在耳則人事
之變又可知也嗚呼悲哉澍人才調絕倫先君子常
目謂吾家道韞今讀其詞芳潔雅靚有林下之風性
又慈惠好施急人之窮於其不報吾母之率澍人為
捐錢五千以具棺至仁在心不敢忘并識之

澍社重九詩跋

丁丑

秋悲而菊寒老人易感杜老自謂劉腸而觀其九日

藍田之作亦嘗有今日盡歡明年誰健之歎矣况諸
老合席人人各有此歎則吾意沮社一會將不勝其
牢騷矣今讀唱酬諸什一何使吾心樂也蒼顏白髮
左杖而右几脩然如繪素中描出而發諸詠歌者優
遊舒暢心夷而氣和相勸以加餐相勉以古道戚戚
遲暮之感不形於談笑調詼之間易所稱大耋鼓缶
者其殆庶乎而聖朝尊養之化可窺其一端矣丁
丑菊月少華山人題

古人重九詩曰潯耆年少樂忍淚已沾衣嗚呼少年
之遊雖樂顧令老翁垂涕以悲則鄉黨之俗母已太

薄乎吾間是會也黃上舍載之實為之主諸老之能全其樂殆載之之賢有以助之詎不重可喜歟又書

書亡兜零藁

癸未

亡兜公輔十二受詩于先考習為古風弱冠始學為近體有朋友山水輒為之然得年少詩亦不多既亡肱其篋得詩僅九十餘篇蓋皆得於悟發之真而其人形焉嗟夫以是寥寥者固不足以行今而傳後將棄之乎又不忍於泯然無物揀其中完粹者為二十三篇并雜文四篇合為一通識數行於其首寔先考集末葉落歸本理也且使知者尚悲其死而無聞非

才之罪也已雷淵翁書

太華手書大學帖跋

記昔丁酉先伯氏太華公患眼踰年幾不辨物詩書束閣意鬱鬱無聊輒就卧內小屏書大學章句蚤夜闔眼吟誦有疑字則就視之間又嘿然深思研究文義若心齋坐忘者如是累日所誦不知幾千遍矣公常自言吾於經傳惟大學口熟顧公平生居家孝友與人忠信該本末而貫始終其用心之專得力之深實有不可掩者奚止口熟而已哉公既卒令人泣而收藏之待其孤壯而授之今公弼又補其利弊而改

粧為帖子請余為小識嗚呼公之心畫雖戲墨爛草
猶為人珍玩况此一帖可見公初年學問之工愈可
貴也非疾之恤而荒怠是懼俛焉遊心于訓典志之
篤也古人格言孰非可誦而而獨取曾傳一書守之
約也嘗見書此時兩瞳羞明每乘晨朝日光未鋪作
二三行積日而後成勞苦亦甚矣然逐字存心無一
畫放倒蓋無往而不用其敬也夫一事而三善具後
之人不可以不知題其左以歸之

五老書瀟洛詩小屏跋

陽來書邵子詩林下居常睡起遲
邨堪車馬近來

稀春深晝永簾垂地庭院無風花自飛

李章書朱子詩獨抱瑤琴過玉溪琅然清韻月明
時祇今已是無心久却怕山前荷簣知

性之書朱子詩半畝方塘一鑑開天光雲影共徘徊
相問渠那得清如許為有源頭活水來

景孺書程子詩至誠通聖藥通神遠寄衰翁濟病
身我亦有丹君信否用時還解壽斯民

德哉書朱子詩昨夜扁舟雨一蓑湍江風浪問如
何今朝試揭孤篷看依舊青山綠樹多

歲己丑月戊辰日庚戌五老用睢陽故事會鄭尚書

雷詩集
第酒半出花殘數幅五老各書瀛洛詩蓋夜遊秉燭
意也未知繼此幾年能作此會而每會出此殘一諷
又各書一詩以代在歌則雖至累百殘不厭其多也
第識之

記昔丁亥仲夏余與兩尹台集于鄭公家其時俞四
宰良甫與吾四人為五老共和杜祁公睢陽詩以為
樂矣至今再閱歲踵成此會而俞公去安公來杯酒
談笑之間黹顏雪鬢如在目中未嘗不悽然作懷也
又題

尹季章

鳳五

五老會圖題

已丑暮春庚戌三宰尹公季章將歸湖中余與尹尚
書景孺安京尹性之送別于鄭判敦陽來第仍作五
老之會酒闌出花殘數幅五老各以所好書瀛洛詩
以資燕嬉亦一時趣事也既而季章倩龍眠形諸繪
素納之歸裝噫嘻我知之矣山家酒熟柴門無客疇
昔之遊瑩瑩在心于斯時也出此圖而觀之則靜院
清簾素髮相飄含盃揮翰笑容可掬而公亦其中之
一老耳拉以陶情寫憂不猶愈於夢中識路乎公之
屬余一言以余識此意故也歟德哉題于榮老堂

華陽先生手簡跋

辛卯

右帖韓太僕伯昌家藏華陽先生手簡也先生之學
嶽峙海涵靡所不畜雖形諸尋常毫墨者沛然如禹
之行水行其所無事而已世之規規於格法態色者
固不足以語此也蓋伯昌之先溪門之外孫也因以
服事先生相視為師友其往復札翰不啻累十紙而
傷時憂道之志將善規違之言惻怛溫醇使後之觀
者真若親承謦欬於函丈之前嗚呼可敬也已向非
韓氏三世好德之誠素見重於斯文又何以得此於
大賢也慨古道之難見哀今時之不然書其左以歸
之

陶谷五世譜跋

余菊祖同知公永平公父子長德風流在當時為名
勝而後承單微文獻罔微寢遠寢泯幾與墳草同腐
悲夫宗人公理永平公庶曾孫也世家維揚楸下自
為兒服事太華又從謫南荒以愿慙特見獎愛太華
卒而君歸田故土有子漢吉又從余于洛始來頭角
未壯矣今其髮郁然蒼矣然飢寒之弗移憂樂於必
偕甚矣似乃公而徃徃以耳目所得文其質余之詩
書校修頗効其力信可人也歟君自傷先懿之沉伏
不章廣搜世譜家乘若碑刻文字繕寫為一冊俾厥

五世逸事粲焉足述向非用心之勤恒存乎敦本追遠庸能就此乎既又謂是錄出自孱孫不藉人為重安保其必信於後以謂于余嗟夫余固善君之為抑且有慨然焉世之人能知其身之所自出者鮮矣至當地闕進取之塗樂舉某公某卿以高人若是者得無愧夫斯錄也乎遂題卷尾以遺之

題趙學士景瑞

琰

四木圖說後

右圖童子之戲其為技雖末反之於道則至理存焉起于坎入于震從局中之直道而西至于兌又北折而復于坎利乎進者也然常行于得失成敗之塗憂

虞無已時然遇樞而不居底乎其免矣夫入于震得
樞而折徑出于坎利在速者也然樞者一局之所爭
得勢專而受敵多其免焉者偉耳踰震而南入于離
北折而下達于坎固似迂緩而無奇者然離乎要害
鬪爭之場矣如據屋脊俯視關阨知難而止見可而
動皆足以相幾而制其變故离下一二宮為局中第
一福地云夫世之欲樞者滔滔矣遇樞而不居焉者
寡矣迢然高引志不在樞者者遠矣有能觀象于是
而反諸身大人之道幾矣又有善始而無終者有始
屯而終亨者有始與終無咎者此時也君子語道不

語時然滿招損謙受益天之道也景瑞此說誠奇矣
徒言天之運不及於人事未若石洲從政圖說之諷
戒切而有補於世也

記

遊玉流洞記

乙未

繇陶谷弊莊西走五里洞壑繚以幽有泉循崖而下
噴而為飛瀑潄而為清潭州人名之曰玉流洞昔我
曾王考罷官山居以肩輿遊焉顧以樂之擇西巖之
上而亭焉以俯之與一時名公相屬為詩玉洞之瀑
始名於國中矣乙未秋余讀書山寺從里老二入步

屨以遊焉是日也天新雨澗谷之水自水洛右脊來者合為一流茲瀑焉為歸瀑得是水而氣益壯聲益厲噴薄激瀉於兩峯之間其勢若不可禦甚可竒也同遊老子呼我於石磴曰此紫烟之臺也立我於絕巘曰此香爐之峯也坐我於一松二石之間曰此故亭壚也先尚書宴飲于此某客侍焉而行酒者某僧也嗚呼叟昔與吾祖飲于亭翼翼其薨也秩秩其筵也今者與吾飲衰草之沒吾屨也蒼烟白露之沾吾衣也又安知他日之來松不為石乎石不為松乎又安知叟蒼顏白髮與余飲酒如今日之為乎於是舉

酒相歡歌以詠志既罷鄉人曰不可以無記遂書于東庵之燈影寮下

二松園記

丙申

園之有二松豈獨吾園哉而吾園特以二松名者何所以志也園中舊多大木春夏之時與上苑木交國家以近苑民家林樹茂密穿窬之徒因緣度其跡甚不便悉命伐之於是吾園木高大者盡於斧斤獨二松一柏幸而免焉其後十年柏又為風雨所拔其他楓栝花竹之皂葉而叢秀者顛倒披靡不可勝數獨二松巋然立乎斷榦敗葉之中其色益嚴而氣益壯

嗚呼可異也於是家大人攜二子舉酒於松下既而
愀然作曰松之茂矣此吾祖之所爰也斧斤之莫女
毒也風雨之莫女挫也鬱然為故家喬木殆天之所
扶鬼之所相乎吾欲取竹亭故材重構數椽於園中
築斯石也鑿斯池也以與女宴息述先興廢子孫之
善事也

園中舊有竹亭名曰涉者
曾王考所等而今亡矣

女其識之既又名

其園曰二松以示不忘斯志他日亭成又將扁之以
二松云姑為記

遊西湖記

李宜叔家西湖遺其從兄士受書約以上已遊西湖

士受以宜叔之書要余兄弟與俱於是提雙壺出桃花洞訪外族之在江上者馳至玄石諸君皆已在舟中矣士受携一壺黃仲遠挈二榼後至李季和無所持士雅具二大爵將以浮二君者而率不浮以季和最先至仲遠所持者奢也金先澤汝述烹二大魚佐酒行酒自季和始率於余序齒也宜叔具食舟中各餽一盃遂行過守玄亭維舟登望蓋士雅先之余與宜叔後焉餘人不能從詩人尹治寓居江干使人邀之不果遇至仙遊峯下仲遠擎壺以歌汝述和之諸君舉酒相屬以為樂自茲以還醉不能記蓋進泊小

岳樓將至杏洲者仲遠不勝酒操小艇適去日且暮
遂回舟云

聾聾窩記

扶風子阮老築室于馬江之上而名之曰聾聾乞余
文為記余曰申繻曰名有五不以隱疾今夫聾與聾
天下之隱疾也叟奚取於是而名叟之堂乎叟老矣
耳將不聰乎目將不明乎雖然不至於無聞無見焉
則斯名也不既過情矣乎翁笑而應曰吾年七十耳
固不聰矣不至乎不辨六律之音矣目固不明矣不
至乎不察五色之章矣謂之聾聾自知其過情焉其

以名吾堂也必取於聾瞽焉無他蓋取其無用於世耳吾必乞文於子者亦以知吾無用者莫子若也余曰唯唯今夫舉世莫不以有用責夫人而叟乃以無用勉乎已果也其無用於世也昔者南伯子綦遊於商丘見大木焉其細枝拳曲不可以為棟橰其大本壅腫不可以為棺槨子綦曰此病木也故至此其大支離頽隱於膺肩高於頂兩髀為脇五管在上其為疾有甚於聾瞽矣以其無用也故能養其身終其天年夫欲養其身終其天年則雖真有廢疾而無用於天下古之達者猶有取焉雖然所謂聾者不能自聞

也人無與爭其間矣瞽者不能自見也人無與爭其見矣故因謂之無用叟之不聾且瞽衆人之所知也而欲聾其所不聾瞽其所不瞽以求無用人其信諸叟何不并與其心而聾瞽之我叟居家物之有悅乎耳目而叟乃拒之不為悅是彼之可悅者已入乎心也夫物之在心耳目有不為用者乎必也冥其心使物之在耳目無將迎無拒塞無適無莫與神而遊而至於耳與目忘目與耳忘心與耳目忘始可謂夫真無用也始可與言大道也始可以養其身終其天年也叟何不并與其心而聾瞽之我叟怡然曰此吾志

也子能明之請書此為記吾將從事焉

宋徽宗畫記

庚子

有遊於燕者購古畫一幅以歸因其徒卞君請余為之記視之乃宋徽宗所為桃源圖者也漁父一人源中之人凡二十有七而人各異其態若造化之賦物焉余乃拊而歎曰畫乎畫乎棲帝乎五國者非虜也畫也夫自天子達乎公卿大夫士農商百工之人罔不事事一日怠業則不成天下之務故大禹惜寸陰文王日中不遑食周公坐以待朝孟子曰鷄鳴而起孳孳為善者舜之徒也當其時天下皆已治平矣四

夷皆已賓服矣聖人猶懼其未也故其勤若茲蓋以
身先天下勉其勤於業也嗟夫余讀宋史徽宗之世
可為痛哭矣天下崩裂戎狄橫行社稷之命朝不能
謀夕方其時君臣恐懼內講修攘之策外治攻守之
備汲汲焉如救焚拯溺引忠良計大事竭智殫力勤
勞如四聖之為吾猶懼不及而徽宗乃晏然自以無
事惟戲玩是崇是業方其為是盡也士雖抱奇策異
謀欲以聞者必且不能入矣左右婦寺有不以茲窺
主心熒惑以求幸而敗天下事者乎嗟夫上之心已
渝何責夫公卿大夫士農商百工之人之不事事哉

上下怠業不以天下之務為心盡誠工安救國之亡
哉用是至於俘也故曰棲帝於五國者非虜也盡也
或曰帝既辱乎五國憂愁鬱邑或者假此以自娛斯
可哀誰可尤是尤不可帝之辱乎五國固已忘其社
稷矣獨於盡竊竊焉不忍忘猶且為之乎南朝君臣
聞之其孰不解體哉嗚呼嚮令帝勤於為君猶盡也
工於治天下猶盡也豈其辱於拘幽後之人君其庶
幾監于茲哉既而書其說以為記

毛將軍盡記

南子觀盡於俞子之室有烏猿焉俞子曰子嘗有言

觀畫有術求之色相之外意匠之間而畫者之心十
常得其八九子試觀此誰畫也南子曰此道君皇帝
之畫也俞子曰子何以知之南子曰以其意知之耳
吾觀猿之哺子也大者顧以予小者仰而接吻吻乎
如聞其聲也夫道君之拘於五國也父子不相育一
止而一南雖得一飯其心思與康王共之故儼是畫
以自見以為其父子曾不如彼猿之相樂也俞子曰
善哉又有白鷹焉俞子曰子觀此誰畫也南子曰嗟
乎此毛將軍之畫也俞子曰子何以知之南子曰亦
以意知之夫畫鷹者飛之則雲霄下之則枯草之野

而下必有獲焉今也集于海中窮失所也下無攸獲
心不歎也視其目尚疾視其翼戢而猶竦視其拳握
而未固奮銳而思奮者也夫毛將軍窮而有志者也
內憂讒口外逼強虜棲於海島之上跂足引領未嘗
須臾而忘中原故其心之存發於畫畫乃肖之焉俞
子曰善哉子為我歌之南子曰若道君者吾無取焉
毛將軍之畫其可歌也已歌曰

何彼清揚兮鬻以長雖則清揚兮居不臧曾陰變黷
兮邊吾鄉鵠集鳴嘯兮翺且翔有孤九尾兮坐入床
有虺兩首兮啄人腸為君一擊兮心遑遑女手其瘠

兮掣不剗女羽卒譙兮决不張豈無驚鳥兮飽不颺
流淚滿目兮填倉皇悲哉遼遼兮時不祥

壽侯廟記

壽侯古之賢人也考其生時雖在戎馬閭爭之間毅
然以正直自居難惑以非理不常者也而後世言侯
事者多神恠君子耻之其說本於外史所記玉泉顯
聖之事而傳會之而中國人尤好神家事侯如生我
國廟侯者二民不得私事然所以廟者其說亦神
萬曆二十年蠻人取我西京李大將軍帥師來救方
戰若有神相之者而軍中之人有見侯橫刀來逐賊

賊由是大崩故我人德之為立廟云或曰大將軍宿
兵城下畏賊不敢戰我人憂之飛言於師曰來日必
戰關侯夢我言來日助女殺賊於是大將軍聞之氣
奮及晨而戰士無不一當百故廟焉以信其夢或曰
大將軍詐為夢以恐賊而欲神其事故使我人廟之
此二說或近於事情然因是而得廟焉非所以為侯
榮也夫以侯之忠義自應得廟又何必以怪異難稽
之言為據而後可哉其時群臣多明於大體必不為
是也然則此特出於婦孺之口者曷足疑哉且今侯
有神昭烈之止于獠亭也而侯之死屬耳其神當益

靈侯何不助帝而破陸遜漢之亡也又何不助傅僉
以堅劔閣之守而拒鄧艾之入也何其不能神於數
十年之近而能神於數千年之遠也故謂侯神者必
將罪侯者也嗟夫死而廟焉者非侯一人而已獨侯
以神稱愚夫愚婦尺布賈錢之幣日瀆於前而憂愁
忿歎輒有愬焉其為侯之耻辱也亦已甚矣余故作
此記庶幾使過廟者肅焉

逸民南公畫像記

王氏之亡多全節之士鄭文忠以死全節吉再父徐
甄父以隱全節鄭文忠吉再父徐甄父皆著於世當

其時又有南公乙珎以狂全節而史傳無見焉揚州之野有谷曰沙川父老以為南公所居又其東有石室實有南公像刻于石而被髮焉或曰南公當王氏政亂知其亡去妻孥子被髮以逃隱於巖穴之間鄉人高其節即其居而像焉或曰南公始仕王氏及

國家初興佯為疾去耕於沙川太祖固起之不可

乃環其地封焉誦曰沙川伯二說不同然以余考之隱遯之士其名節一為人主所知則其跡常著也南公雖自廢太祖既錫土而褒之矣國史何以獨不著意其見幾於王氏之末泯跡逃名以肆其志而上

之人莫得以知之故其事遂不著也南公事雖不中
聖人之道其節甚高故余謂之以狂全節者也孔子
曰逸民伯夷叔齊夷逸朱張伯夷叔齊見於傳託夷
逸朱張不見於史意公其夷逸朱張之流乎余既悲
其人而悼名之不稱也遂記其像而著之於世

景陶庵記

世之慕陶子者徒能言其跡耳言其志則皆謬矣原
陶子之志豈真安於獨善而不樂乎事君者我豈真
耻夫官卑而祿薄者乎又非真以折腰向鄉里小兒
為辱者也然而循其跡卒莫出乎三者其陶子之所

以卓乎不可尚者歟陶子之志蓋有已獨行之而欲
人勿曉者是以假五斗米以混其跡假督郵以行其
志假小行以就大行是陶子之所不得已也不然特
皦皦自好者之為耳而謂陶子為之乎臨漳監祀溪
俞君始守南充數月移治于漣不赴挈婦子歸歸來
山中扁其室曰景陶余不知也陶子之所不得已而
公則就而慕之果有所不得已者存焉吾固熟思而
未得也重念公非能夫耕妻鋤終世以遯藏者如有
用我者油然而起矣非必甘樂仕祿而後然也其所
遇之時與陶子懸矣不可與同其出處故耳然則可

同者特去官去官細節也立志大行也強其細節欲
投其大行不已夸乎嘗讀錢蒙叟陶廬記云今世隱
約之士俯仰無聊哦幾篇詩種幾叢菊便以柴桑自
命殆東坡所謂陶淵明一夕湍人間者此言使人面
壁雖然有說焉夫彈琴而消憂引觴而怡顏登臯舒
嘯臨流賦詩此陶子之所樂而公之所有也世莫得
而爭人莫得而泥於斯乎雖謂公陶子也可也是其
可歌也遂為之言

三菴齋記

行聖人之道任天下之事者苟與不苟而已苟者朱

子所謂粗畧之意又易之稱而大學問大經綸皆繇是生焉然其由之也有內外之限焉義利公私之所以分也故君子嚴之以剛大守之由乎內者而粗畧而易之志日退故惟懼其苟焉由乎外者而粗畧而易之德日進故惟懼其不苟焉由乎內者修身齊家治國平天下之道自己而施乎物者也由乎外者飲食車服宮室財用之具以物而養乎己者也其外也天下之與吾共者也不可以乏乎己其內也天下之望於吾者也不可以不乏乎己故陋巷簞瓢粗畧之至也顏子自以為足然求至乎夫子而未至焉則

乃喟然而嘆伊尹囂然樂於畎畝之中不顧千駟而
一夫不得其所則憂使其君不及堯舜則耻夫德莫
剛於顏子志莫大於伊尹故其於聖人之道天下之
事為之如彼其至也無他能苟於內不能苟於內而
已矣今之君子或反是為口體謀而終身病其不足
者為天下謀則曰是不苟而足矣甚矣利私之害人
也非明者何足以語此杞溪俞子恭吾黨之篤學君
子也於世不苟合挈婦子歸隱河上誅茅築室苟可
以御風雨矣墻下樹之以桑苟可以無寒矣躬耕于
南畝苟可以無飢矣則子恭殿如也大書其扁曰三

苟過此以外者萬鍾之富固不顧也然入其室而絃
誦之聲洋洋如也披其帷而詩書六藝之文秩秩如
也聽其言會萬殊而歸于一推一原而散之萬陰陽
之變仁義之常微辭劇談津津如也既行之於家將
以施之天下而猶未也蓋俯首讀書窮其理汲汲如
不及子恭於內乎能不苟如此孔子述大禹之德先
稱其菲飲食而惡衣服而卑宮室而曰吾無間然矣
孟子所謂飽食煖衣逸居而無教者反是而言之也
物之易感而至難足者莫切於三者故子恭平居反
復自省以寓楹盤之戒者必自三者始蓋有得於二

夫子之意也然子恭浸浸及於衰矣而其道不行於
世吾恐其志之怠而德不加修也輒以劉大之說書
為齋記

雷淵集卷之十三

雷淵集卷之十四目錄

記

遊洞陰華嶽記

三一堂記

箕子廟記

益齋李文忠公畫像記

清風府學記

安文成公祠壇記

東遊小記

九

門巖記

壯節申公祠記

淨白記

月沙李文忠公家藏史書記

李文忠公古梅記

南窟石壁記

安邊府香雪軒重修記

三朝御墨記

雷淵集卷之十四

記

遊洞陰華嶽記

洞陰為縣用山水名然厥土饒瘠不宜禾穀
麻絲故庶民居者鮮少士大夫休退高蹈者
多居焉其尤著者思庵朴文忠公蓬萊揚處
士峒隱李處士暨近世農巖三淵二先生皆
嘗卜築於玉屏白雲之間而三淵臨尤奇於
國中山水杖鞋殆遍焉余嘗遇三淵於縣之
旅舍公辱與語所觀山水之勝而獨於洞陰

疊疊焉且曰海山曠園之東為最江山秀四
郡為右溪山窈洞陰甲焉嘗著洞陰名勝可
遊者記而老且病未卒藁焉於是家大人宰
是縣也余將騎驢一出盡山水之幽賞訪前
賢之遺蹟而姑且俟其記之出將載以東焉
居無何而三淵歿矣嗟乎使山水不遭先生
也則已矣旣遭也又樂之甚而卒不得其文
為記亦其不幸焉耳其後余卒出遊與華陰
僧勝天俱天也昔從二先生遊最久其出入
起居未嘗不在左右凡在縣內諸勝雖一泉

一石之竒天也必為余道之每行輒揚錫為
之先今雖不得先生記與俱然與此僧遊則
猶記也既歸述其遊為一通如左是遊也實
自白雲遙入華嶽之陰徜徉二日而返錄中
并及之故目為洞陰華嶽記云

壬寅三月十三日戊戌偕伯氏覲洞陰親衛妹婿完
山李文遠庶從叔宗之實從焉蓋將因此謀遊山也
出東小門過石串村時三淵喪未葬殯于其季稼齋
公宅仍吊焉兼言金尊父兄弟夕投楊州墓廬飯已
與同遊及里中諸老乘月聯步扣雲水庵時夜已闌

僧徒正欲就睡忽聞山谷中人語則疑山盜驚相呼
提棘杖出及近則潏然皆喜粲然皆笑是夜寄宿丈
室

己亥平朝遵山西小溪行是歲節候甚早峽村花柳
在處瀾漫過盛而近衰余等相顧深以過時為恨有
洞陰官人荷酒壺從笑謂余曰勿憂也洞陰有山處
必臨水水氣寒故每年花事殊晚直到四月初方如
此間三月半矣午飯抱川松隅村過謁花山書院觀
白沙遺像尋馳至縣齋日已夕矣家大人正坐東軒
吏退無簿書忽得四人相踵入謁其慰喜可知命酒

與詩陪話至鷄鳴退宿草堂

庚子四人騎從家大人肩輿遊蒼玉屏屏去縣門不
十里近則思庵俎豆地而峒隱及文谷金公并享思
菴文谷有遺像在蓋嘗見思庵二養亭記有曰吾東
山水永平最名由一縣而言清泠潭其尤也潭則白
雲衆溪之所瀦而源發白雲山縣之名山曰鍾賢其
東支騰聳至潭口稍殺而為崖崖脉散而為石盤陀
彌一壑故潭底皆鋪全石無寸土其稍高者露出水
面若龜龍曝日島嶼浮溟詭怪錯陳有類石牀者曰
吐雲牀有類石碓容斗者曰窪搏牀可以寘琴棋搏

可以盛酒潭之北流西折而為灘曰鳴玉有大壁屹
然障潭北一面峭者劒拔秀者笋迸突者為援纍回
者為龍蟄竒詭萬狀而磅礴為一塊極造化之剗剗
曰蒼玉屏雲霞中蔚水氣上蒸常若有光瑞世傳峒
隱常按鶴氅攀壁窮其顛其行如飛望之者皆失色
而公不懼玉立吹鐵笛數弄久之不返云潭水皆從
屏下行繞出屏後達于漣漳崖之逶迤而俯潭為臺
者四曰白鶴曰青鶴思庵記謂記實也蓋其時有羣
鶴或白或青
往來洲渚間翱翔
于臺上故名云曰散襟曰水鏡二臺之間有石刻
松筠節操水月精神八字則尤翁筆而宣廟獎思

庵語也。潭之西散襟之上曰拜鶴窩，則思庵舊居而
今為院潭之西院。之左青鶴之上曰二養亭，則思庵
讀書所。而取伊川養德養體之言為名也。登亭騁眺
則群岫葱峭，雲烟之吐吞，林樹之晻曖，鳥獸之遨遊，
魚鼈之潛泳，舒慘萬變，表裏相形，闢竒競秀，各不相
讓，而卒皆收精會神，來效於几席樽俎之間，使人嘯
咏優遊，境淨意適，自不知形骸之為吾有，萬物之為
吾累，豈不快哉！是時花候尚早，半開者十八九，全開
者十二三，餘皆蓓蕾，蓋如向者荷酒者之言。李老必
文思庵外裔，而居院村，能談故事。鄭生國賓，義嶺山

人能詩喜山水與院儒五六人步履至冥酒窪搏酣

詠半日既夕將迤訪金水亭汴溪步數帙地得蓮花

巖巖在溪心刻蓬萊詩自書

詩云綠綺琴伯牙心一彈復一吟鍾子是知音

冷冷虛籟起遙岑江月娟娟江水深

咏罷相與和之旋從左麓小蹊穿

田家鷄犬行數十步麓勢稍陡起上頗平衍松杉雜

植潔淨如掃遂植杖藉草起俯視牛頭潭時返照正

在潭面潭受日光益清水底沙石皆黃如鋪金屑魚

蝦之往來可一二數也稍左數步而麓勢忽夷以奧

方如碁局而亭着其中制度小而結構工苟睇小姑

山前臨浮雲壁右蓮花巖左迴澗石盖水自松亭

在縣

門外

奔流甚急至石角折其湍到亭前却演渟若池水
石之得名以此凭欄遠望凡寓於目者皆若為亭效
奇極有情感處勢僻隩遇境幽宵三淵所謂如山人
韻釋者真善評也李老言亭本思庵舊樓而蒼玉屏
為蓬萊所有旣而各以所好易之云余因其言而默
想二公氣象可知蓬萊過於好奇而思庵胸次自寬
平也家大人先還余等與衆賓留飲旣醉耳熱各折
檻外花梢蘸水灑面已而見月出遂起去自亭後歸
忽石崖雙起道出其間仰視有大刻曰洞天石門

前

則為迴

瀾石始知由石門至亭為正路而向從蓮花巖來

者為玉屏遊人徑步也

辛丑在草堂點檢昨遊詩軸既倦又步出南溪風于松亭亭去縣門適數十步前臨大溪是溪實自水洞來東流為牛潭又西折為清泠潭又折以北縈玉屏出臨漳溪邊林木蒙密如張幄綠陰滿地頗幽夔可意介於邑間烟火之中而鷄鳴犬吠居然有桃源之想

壬寅將遊白雲山山去縣門六十里親教以馬僕累日淹滯山中有弊只許三日便歸於是討輕裝二衾包二酒壺一肴盞三斗量一人負以從一小囊入硯

具詩箋掛馬首鞍腰分裏馬食家奴盧同丁鳳伊傑
仲昌及一官奚俱早飯訖四人聯騎由水洞出一洞
皆水丹花甚盛三十里不絕或騎遵溪行或步循水
淺處踏石去道遇華嶽山僧勝天暫憇沙邊共話白
雲事知其可與遊固要偕行天曰小僧既有事下山
雖不能從今夕當疾步達白雲可於內院相見余等
得此意益張如遇一鳩摩矣逵登卧龍巖巖以勝名
與金亭鷺洲俱稱而顧無可觀特一蜿蜒石耳午食
風珮洞憇農巖舊宅門徑荒蕪有一老僕者守總壁
間多見古人詩句徘徊諷詠使人淒然作懷以輕衣

散步清泠瀨七松之間則峒隱釣臺

思庵嘗過峒隱溪亭有詩曰路

入田間纔過馬草亭傾側夕陽紅王孫未到春先去花落釣臺潭影空即此

而後為金氏

有文谷晚年欲構一茅亭為歸休之所而先命名泠

泠

葛稚川詩有洞陰泠泠風琚清清之語而縣稱洞陰故仍有風琚洞清泠瀨泠泠亭之名云

亭

未成而遭世禍至農巖始克營之語在農巖集中而

亭今亡矣潭水清淨徹底往往照見石面墨字輒用

筇枝挑出蓋皆三淵筆而或書枕石或書漱流或書

可受元章拜如是者不可一二計尋得一蒼石潭口

狀殊奇有詩題其上曰朋徒惟古松韻味亦蒼竹不

遇三淵翁誰憐老空谷余則記其傍曰味處士此詩

似有感者吾聞處士坐潭上見異石碁寘輒令左右
取來而是石適入其手以達於處士則其中亦必有
不幸而不遇者矣處士殆有感乎此歟書已還于故
處行過桃李坪得所謂仙遊潭此為白雲洞口幽灑
可喜薄曛始至內院上禪庵聽老僧惠雲誦經夜燈
初上而有僧自楹間拜曰山行得無勞乎視之則勝
天也是夜天無片雲月色皎然

癸卯晨起遊曹溪從寺僧戒察乞得一芒屨勝天前
為導溪之距寺不能數里始緣溪上百餘步皆白石
玲瓏絕無硯礫之累水行其間隨勢停瀉深淺紆直

皆曲有意態由此可入曹溪曹溪者古寺也今廢寺址下白石陂陀顛委幾十數丈而有泉橫曳其上為卧瀑凡作兩折折處輒成小泓清淺可弄溪南蒼壁橫帶農巖所謂要當為一山最勝處者蓋諒論也還寺攤飯復出溪上汴瀑尋太平洞洞蓋此山最深處峯岫澗壑靜秀縈繚石壁尤清峙可喜但恨地勢不寬夷水無演迤石多磊疊使人無俯仰優遊之意涉斗巖斜眺只見松栴峭蒨若雲霞然相携欲更進而勝天止之曰自此林深徑阻不易窮探且無別般奇勝會日暮遂題名于壁南回到惠雲丈室宿是遊也

文遠欲騎籃伯氏不肯曰雖不及古人與衆同樂何
遽勞人以自逸於是惟以一筇行登降崎嶇之甚而
卒不用肩輿以是能搜攬幽隱殆無遺勝又雍容自
如隨處款洽不被僧徒厭苦是夜小雨勝天為說華
嶽諸勝甚悉直至曉磬余等甚喜不能寐飄然之興
已在華陰谷雲之間矣然以來時面受親誨難於擅
便遠遊則相與聯名為書以明發徑入華陰之意馳
報縣衙又請益人馬糧若干

甲辰曉晴走一奚帶書入縣遂發由寺右岡脊遷迤
走數百步忽分為兩麓一走東北一走道左起以伏

類碾口之缺而叢木被之頗窈窕又起以走十餘步
便旋與越麓對離而不相及者劣容一騎蓋起者為
蒼壁缺者為流泉泉之始落激激如轟轟如象水確
之春焉既而縈壁行出于離浩乎其莫可遏也詢名
於勝天天曰山中人日往來此間而曾不知有此瀑
乃今獲之蓋似有待焉余嘗聞農巖與三淵尋凜巖
瀑竟不知其處有一老人指其路所從入窮探山澤
間又不得悵然而歸縣人金生錫龜為余道其事此
瀑豈真是歟於是相與謀所以名之者或曰是水也
非壁之為障也將散漫澌洩無異乎行潦也則壁之

功為尤奇請名其壁余曰不然泰山非無水也以山
名洞庭非無山也以水名蓋取其大焉是水也發源
于白雲遊波乎水洞放洋乎牛渚茲州之勝水之助
為多且夫已起而中缺將合而終離者豈壁之欲哉
然而造物者為其缺通其行為其障蘊其精為其離
復達其流相其鋪實專為水地也天可違乎請名其
水伯氏曰然奮筆大書壁面曰白雲瀑下題四人名
遂行循東北麓小徑石益多林益深不可以騎下馬
步斬林中花木為杖逕漸欽巖或高或下踰鞍峙桃
麻峙二嶺脚力頗倦得古木盛陰輒坐憩如是八九

里後山勢稍開前畧稍寬一溪潺潺橫前勝天笑曰
自此漸入佳境矣始乘馬渡溪行數十武又得溪時
山花半坼杜鵑躑躅尤盛間以薜蘿深叢紫翠渾山
幽鳥相求鳴聲上下却顧來逕欣然有出塵之想矣
亭午微雨暫投盃南村中火乘雨小歇訪七仙洞大
石盤陀作九級瀑由石上奔流隨級作折約長數百
尺雪沫倒射雷殷山谷雄壯過曹溪問七仙之義於
勝天其對實近齊諧不可傳

勝天言山靜月明夜有
七老人騎白鹿白驢來

遊故名云

余欲窮其源泝瀑上良久只見群山周遭山下
有一櫟屋老翁牽蘿補籬就問水源則云甚遠且險

未可造次尋覓俄雨復作衣盡濕狼狽尋來路還陟
成氏亭同遊皆已避雨登憇矣亭在瀑東不十步而
頗爽豁可人意書生數三輩讀於其中乞鐵鐺煖酒
相屬凭軒望弼雲山色晡時乍晴則疾驅過疊石薄
暮始入華陰洞口先尋谷雲翁遺祠拜盡真登籠水
亭讀尤菴所撰碑記先遣僕馬就伴睡庵炊秣負策
隨其後庵去洞口甚遙以隩屢憇屢起鐘鳴時纔及
寺門道側林樾間隱隱見亭臺縹緲而皆未遑躋攀
俟明日一縱目焉有十餘僧皆能識字又喜談山說
水應對如響小沙彌智行尤清敏可愛携燈邀客至

其房指閣中梅曰此先生舊梅也僧等共養護之猶待先生也此間人皆稱淵翁為進士先生云是日金尊父為檢淵翁遺草來住下村三淵故宅因勝天相聞借谷雲集來其記華嶽名勝甚詳與聞諸勝天者一一相符但所謂表獨立臺逍遙遊堂閒來往橋等處載集中而勝天不能言蓋擬議名跡而未及揭版故不傳然亦不過吾輩筇鞋所及而非有別區也夜分欲就睡忽聞敲門聲呼僧出者乃曉送人中途遇官伴付書回衙渠便還追及于此傳家大人賜書有曰白雲固多名勝且近釜淵谷雲恐非三日遊可了如有

餘興可且更留數日但無過飲涉險也兼送壺醪榼
肴及行資如干時橐錫瓶枯正爾愁悶而深山寒夜
得此美酒膏肴羅列在眼而來日遊山之資稍復豐
侈矣遂共進數杯以拜賜賦一詩以志喜

乙巳晴飯訖下山登憇松風亭蓋此地環以崇山脩
嶺四面無寬曠徑路長川大壑經緯其間其始居此
者皆山氓逋戶烏獸群聚非惟近貌而然實地勢使
然也清寒子肇披荆棘誅茅以居山中人尚能言五
歲童子而後數百年谷雲翁又卜築焉翁沒而三淵
繼其躅是亭則谷雲初剏架石壁俯清流

壁之上而
刻華陰洞

天下面刻
月窟泉

極軒敞瀟灑石根過溪而益陂陀可坐十

數人曰人文石刻河洛圖書之象傍有小巖前羸後
殺可坐四五人舊有亭曰三一而三柱一極今廢矣
溪中多散石皆瑩膩如玉雪濶相薄與松籟交如笙
簧琴瑟之奏焉仍咏左太冲何必絲與竹山水有清
音之句久之不能去待朝霽微霽還坐有知庵庵亦
谷雲所構而別其東一間奉武侯與清寒子遺像蓋
以清寒子實有開山之功溪之下流匯為深潭自古
相傳謂卧龍潭故取廬山祠故事并奉武侯而朱子
祠記曰來者尚有以知余之意也清寒子自言後世

必有知我者堂之得名本乎此云余等欲拜二像而
守者以門戶不敢擅開辭心殊悵惘然喜其言得體
不復強緣溪下過淵翁故宅共尊父討話聞二公居
山時事其曰博厚室則翁燕居所几杖琴書具在曰
悠久堂曰高明樓尤高爽有眼界壁間見翁自書衡
門三章又小東臨溪得一草亭扁以宛在坐亭上望
水東有黝白色類鹿伏草中欲往觀之由木欄橋越
溪稍近廐則決驟立松林間顧視人久不去四人棄
杖草間攀藤緣崖纔及廐所已失所在有小鳥觜紅
衣青者數百繞林悲鳴若驚人相告然稍稍前步小

蹊殊未了蹊斷而得一石窟狀如有屋轎子劣受三人前面撐雙木柱緣以小欄可凭其高纔容危坐不可立然面界劇寥濶自伴睡以下至洞口諸勝窮日不能盡者一眴而可坐攬矣豈翁晚年倦遊故出此奇為坐卧領勝計歟庵新構未名余則錫名曰白鹿庵蓋以非向之白鹿無以引客來此而獲此奇也既而取庵右細磴徑至山下窺卧龍潭潭光青深如藍有小童腰魚筐垂釣一舉輒一魚余就借釣竿有難色余給之曰而不知此山進士先生乎胡乃不借一竿兒則懼然授之余三下餌卒不得魚則笑以還兒

伯氏笑曰事在熟之而已汝之不若兒不熟故耳遂
出洞馬僕已來候矣行過望月巖巖上下皆躑躅高
者可二丈各取一枝馬上挾持以備二嶺之須迤過
元化壁壁去路側咫尺來時日晚且有雨勝天故諱
之故余等初不知有壁也及是始言之得以歷觀削
立數十仞雄峙幾百步其皴若斧劈色蒼黝如玉屏
而瑰奇不及有泉從壁顛倒墜與峽水合壁根橫鋪
全洞而水散流其上清以淺纔濕馬蹄如是凡八九
曲值絕險處則卸馬而杖入山時遇雨行甚忙且意
專在華陰只管前進在路
山水不暇着意領略及出山則行色殊閒緩又沿流
行知水源所由出合散朝背之勢故得其勝益詳

始下山時豫具一盂白飯櫛葉包青魚入囊中擬終
日優遊於山間水涘本不要入村間討炊遲留既踰
二嶺班坐茂林下開盂共餽從人亦聚坐沙上出腰
帑中宿食喫馬與菽齏放之草際又有清泉出林外
石底飯已相與坏飲既甚輕約又覺有餘味矣隨處
徜徉十步一憩不知山日之已斜還至送老庵宿

即農

巖故宅

勝天送客至此辭歸內院是僧自少周旋名公

間謹敏諳事理同遊四日兩情頗不淺及別贈詩以
謝殷勤之意

丙午早發迤馬馭邪逕掠鷹巖狎秀色還到水洞午

飯馳歸縣衙日未夕矣

戊申訪青鶴洞遊者五人蓋鄭生尚伯

即國賓同新遊玉屏者

來從之也洞去縣門十數里雅以形勝稱至目擊大

負所聞水無縈迴之態山無峭秀之氣又無茂林幽

泉可以漱濯攀援特一懶山帶一無情水耳諗洞名

之義於尚伯其對類七仙之對荒唐不可述宗之甚

捷遇水輒跳過伯氏文遠亦次第過去余獨不能拾

石為梁而後乃渡宗之甚遲之常踰余為滯瀑仙又

自號飛瀑仙以為戲是遊也拈韻得仙字將賦有白

鼈入漁人之筍宗之欲見之跳過水南苔滑石灰遂

溺焉衣巾盡濕余就而勞之仍得一句曰仙人青鶴
歸何處飛瀑仙為落瀑仙一座粲然大噱歸路遊樂
歸亭則芝川黃公所棲止也杜鵑籠山爛開照映一
溪遊人漁子都在錦繡屏中甚奇觀也

辛亥余與宗之將還洛既辭親前退至草堂則伯氏
及文遠因要遊白鷺洲洲去縣門十里近在走洛道
傍地勢頗曠豁不似峽中而山水至此却散緩平鋪
水中多穹石衆流激射縈折而行沙礫為湍頭陶汰
堆一邊如積雪蒼巖蜿蜒入水心特起水觸之遂分
二派左右而流洲名蓋取太白詩二水中分之義也

於是就下流最緩屢折處分上下磯列坐為流觴之
飲飲數巡陟巖顛和白洲詩

巖面有白洲
鑑湖刻詩

以道別懷

即分手起是夜宿松隅村翌日入道峯山中謁二先
生書院由詠歸門循溪步直至萬丈峯下當別有一
記今畧之至東門外與宗之分歧疾驅入城已初昏
矣

遊華陰歸數月又入洞陰窺禾積澗邑子朴再成衙
客金萬彥從焉淵去縣北三十里水自鐵原山中發
源縈紆入縣北自作隕區始激而為瀑中匯而為淵
下流為東流之水淵北奇巖盤陀為臺凡三級松杉

楓栝峭蒨葱蔚日夜與水氣相蒸常有雲嵐被之亭
午不歇下級遷延入淵心魁然攢起砢砢險怪不可
具狀望之如永積故得名云石腰中鑿若釜下通淵
水潏然仰出者數丈居民指此為龍井歲旱縣令常
來此祈雨頗有驗又傍通為石門水吞吐噴薄聲如
雷殷三面赤壁蒼崖奇詭之狀草木雲烟朝暮之態
莫不涵影於淵中淵水清甚易受影故影於水者光
色萬變而水亦隨受作光色談者遂謂水黝藍不清
豈其性也哉余始至肅然而恐殊不自喜旣而掬飲
其水而甘之又見鷗鳥五六容與波中時來親人然

後稍舒情騁目怡然而樂朝至而夕忘歸焉是淵舊
無題名余今從者負石投上流要金君亂流而南刻
壁書三人名且記年日

三一堂記

庚戌

物之為人所嗜者必其有滋味者也。有滋味而至於
嗜則累於人也。亦審矣。余讀六一居士自傳常怪居
士徒知軒裳珪組之累而不知五物之為累。豈五物
果不能為累歟。軒裳珪組之累居士者固甚於五物
則其滋味之入必有甚於五物者。故居士退而與五
物居則取以為適不自知其為累而進而軒裳珪組

焉則已覺其疲吾形而勞吾心矣若伊尹太公自耕
釣以至為阿衡尚父而終始不以一毫累其心無他
其於天下萬物不見其有滋味故耳雖然方其有滋
味也而已知其為累居士之賢於人亦遠矣余未試
於世凡物之為吾嗜者不越乎五物之間而猶憊其
為累况其軒裳珪組而為吾累者安知其不甚於五
物也今欲稍損其累莫若簡其所嗜欲就五物而去
琴又去棋去古今圖書之文獨藏書一千卷寘酒一
壺而與吾一人參而為三一此吾齋之所以名也或
曰物無衆寡而為累則一子安知書與酒之不累子

而不去之乎余曰唯唯然吾之獨取夫二物者以其
雖為吾累而亦有時而去吾累耳方酒之沾吾唇而
嚙嚙然味其旨書之蠱吾心而孳孳焉味其腴其為
累何以異於曼聲姱色哉既而一觴一咏陶然以樂
犁然而喜也向之有味者終歸於無味而至其甚適
也舒暢發越神王而氣充舉天下萬物無足以入吾
心者茲又非二物之去吾累者歟其為累也微而暫
其去累也大而久惡乎其去之雖然徒書也而不以
酒則偏乎枯徒酒也而不以書則漸乎蕩必也二物
相須而吾之樂全矣

箕子廟記

壬子

聖人者不敢違天以循己亦不敢枉己以循天而說者曰當殷之亂箕子以貴戚之臣居父師之位何不囚殷人之心而廢紂立微子以存宗國嗚呼周自后稷積仁累義數十世至于文武周公召公太公閔天之徒輔之雖未為天子固已盡得天下之心惟武王急於救民有牧野之師耳不然垂拱安居而殷之民有自縛其君而奔周者矣安用征伐夫使天下之勢至此極者天也帝乙賢王也微子帝之長子也而帝乙卒不用箕子之言舍微子而立紂亦天也天命弗

貳在武王則必不在微子箕子知天命故知微子之不可立而不立也而說者曰武王十六年箕子來朝過故殷墟傷宮室毀壞生禾黍作麥秀之歌嗚呼箕子嘗言之矣商其淪喪我罔為臣僕故既陳洪範即亡之朝鮮而武王就而封之蓋箕子之不可臣武王亦知之故遂其志而不臣焉箕子既不臣周矣必不以諸侯之禮責之孰誣其來朝者哉微子守先王宗紀作賓于周家則有客之詩所以作也箕子於周不臣也又非賓也而朝之何以為箕子此二說皆不知箕子者

也夫箕子知微子之可以存殷而又知天命之不可
違故不敢立微子知武王之不可事而又知天道之
不可絕故為武王陳洪範余故曰聖人不敢違天以
循已天全以所覆億兆之人附屬于周而箕子曰我
則不可故逃之朝鮮天全以所植方內外之國賓服
于周而箕子曰我則不可故不朝周余故曰聖人不
敢枉已以循天箕子廟在平壤而舊無記豈謂其盛
德峻功之在東土者人人皆能誦之無用文為歟余
懼夫二者之說行而聖人之意不明于後世述此文
使過乎廟者得焉

益齋李文忠公畫像記

癸丑

益齋李公諱齊賢字仲思慶州人也當麗氏之季事
七昏主遇三大難而終始不失臣節君子以為忠當
忠宣王之流于吐蕃也忠肅王在元而奸臣權漢功
等持國陰事讒構王萬端柳清臣吳祈等陰附瀋王
請立征東省于本國文武諸臣靡然從之而公獨憤
曰吾知有吾君而已屢移書于元執事大臣極言本
國歸附之功先王繼絕之義其忠懇之言卒能感動
夷狄而忠宣王復國立省之議遂寢當其時非公一
人忠宣特吐蕃之一布衣而高麗數千里之國安知

不為東海之一郡縣耶忠宣王之討曹頓也頓黨之
逃于元者蠶出而螫王元率拘王刑部禍且不測公
則曰吾知有吾君之子而已從王于北涕泣自訟事
得辨析而王輟復東公之力也忠宣王之遜于江華
也江陵君未至國而公以大臣權斷國事首討亂臣
襄佺流其黨盧英瑞等時國內空虛民心疑懼而賴
公措置得宜轉危而之安此又公之力也最公事君
大節其不可誣者如此余嘗論之處亂世事昏主以
能左右輔弼康濟一時者古亦有其人獨公所遇之
時其崎嶇險阻古未嘗有而公之彌縫推挽之功亦

古人所未有或以公之事比之甯武子大叔儀然二
子者其所說皆當時霸主其言易以入公之所說乃
夷狄豺狼其為力尤難而其為功尤大也公在朝其
犯顏敢諫不及李兆年數公然善因事成功其敏而
多智者歟余又疑辛毗之時公為國元老曾無一言
及毗何也豈竟無言歟將言之而史畧之也牧隱言
辛毗之敗恭愍王語群臣曰蓋齋先見之明不可及
也嘗言毗非端人今果驗以是考之公之言毗亦明
矣然是言也何足以禁王用毗耶其可惜也已公從
忠宣于江南王使古杭吳壽山寫公像錢塘湯先生

為之贊曰氣正以洪貌嚴以恭言順以從今觀其像
豐下美鬚髯可知其福履君子也敬為記

清風府學記

夫子廟之在清風府者歲久毀壞芻風上兩家大人
始蒞是府大懼不理以墜教基僦工募材刻日并作
越三日而正堂成又越一月而廡室成卜日之良將
告成于夫子余乃揚言于衆曰昔者夫子嘗欲居九
夷蓋歎道之不行也今去夫子數千年而推髻左袵
充塞天下仁義之塗壞禮樂之源涇而惟茲東土襲
殷師之舊倬然有先王之風使夫子之神在天下其

必不樂乎中國而眷顧東土也審矣凡我執豆蓬於
夫子之廟者宜益虔而不敢怠衆皆應曰諾又曰事
神者不患無神患其無人傳曰洋洋乎如在其上如
在其下如在其左右謂其德之合乎神而神格之也
二三子盍亦退而修德然後行事衆皆應曰諾又曰
聖人之事神也蓋亦附之教焉事天地示有尊也事
宗廟示報本也事社稷歲瀆示報功也無非教也而
壹於敬夫子之尊天地也夫子之為生民本父母也
夫子之功社稷歲瀆不足侔也故神明之祀莫盛乎
夫子敢不敬乎敬主乎壹壹生肅肅生和和則神明

格敢不慎乎請從二三子習禮容于野歌之以詩崇之以讓三肄然後行事衆皆應曰諾於是為位于學之南大槐之下立鄉先生實尸其禮小大在列清修齋飭不敢有譴言不敢有慢容如是者三而愈自奮厲然後有事于廟登降獻饔雍雍翼翼其靜也如畏其動也如遊進之有覩退之有聞自始訖終罔有愆缺府之人士相告忤躍柔肌洽體莫不充盈既畢事請書其事于廟遂以為記

安文成公祠壇記

余嘗攷高麗史稱安文成公內奴婢百口於太學以

此得從祀夫子甚矣其言之陋也文成固有是也其
得祀不專以是王氏之世佛教大行人不知學四百
餘年而後得文成公實始表章正學以開後人又百
年而後得鄭文忠公而文物大備故二公皆以功德
配食於夫子然文忠公成教之臨易見而文成公倡
道之功難知苟不考論其淵源所自史氏之謬又孰
能辨之哉歲季秋甲子太學之僕人以其牲醴饗文
成公于東廡太學生黃景源曰孰嚴於夫子之堂孰
明於文成公之祀而敢私饗之也非禮也公且不享
僕人曰然則廢之歟周泮水東西此屋而居者孰非

文成公之人也吾儕小人不敢忘公之德維是不腆之毛菜私公於廡下以子以孫今廢之將何以自盡於公乎君曰惡可廢也學之所為教使人不忘其本也若之何廢之使人忘本也古之祀神不廟則壇盍壇乎衆皆悅曰諾於是相地于學之東偏球土而墀焉一易月而壇成方一丈二尺崇六寸墼方三丈一尺五寸周墼而垣中垣而門祀之時仍季秋黃君徵文於余以記其事嗚呼修明學校以俟後之君子文成公有焉僕人之舉豈所謂小人而愛禮者歟黃君之誘人也豈第溫厚不廢人之善其仁者之用心歟

夫一事而三善具斯可以為訓矣於此是乎言

東遊小記

九

屏山

風水是天地噓噏之理屏山是一塊磴硿石萬竅皆通土木以被之

風水之間欲構小庵子直寒碧樓募一詩僧居之夜中從樓上一望燈火熒熒林樹間磬音縹緲度江而來當一奇也春水至乘小艇訪風巖水穴薄暮維舟黃楊木下寄宿禪房二奇也絙索綴一鈴自樓截江以竟庵有詩輒內鈴中掣索而轉下之庵中人聞鈴

聲過江即起接之庵中人有詩亦如之窮日唱酬不煩舟楫往來其疾如飛其應如響又一奇也與月嶽僧體元說此奇元曰善明月樓中記

鶴巖

巖之根入江中往往起穹然可依石盡以匯故多魚府氓宿苦其中輒收大魚數十少左而歸曰芙蓉驟着殊無奇舟益轉而辟益變益出奇為縹緲使人不能過過亦悵然回首窮目乃已鶴巖舟中記

玉笋峯

繇鶴巖左汎二十里東北山氣驟變若烟若雨若噓

以出喻以收有童子髻而僂者稍逼而釋子跌迫焉
則翩翩冠珮而拱矣余曰必也玉笋乎衆曰庾公宴
指出孟萬年者必子也乎玉笋舟中記

龜潭

浮舟龜壁下看峯岫離合之變蓋天下妙觀

余至龜潭宿沈璫舟窩及曉步之江干舟人相枕而
睡蹴之起髮髻髻不巾操櫓立艙首長顧東北雲色
嘗見顧長康畫漁父狀此益信古人之畫貴得其真
也流舟下丹丘洞門江上宿雲方出而未既禽鳥格
格絕江飛子章亟呼琴余曰笛哉石宜琴舟宜笛於

是為羽聲噓之入雲中縹緲徐下一一入衣袖中已
拏舟至葛仙臺下臺在龜屏北登臺以望龜為橫不
了其奇而東北諸峯特秀發盈襟又畫龜之所未獲
坐松下二娥以琴之頗清怨有思長淮舟中記

島潭

島潭水色本清瀉況以晴宵月魄射琉璃鉢貯金蛟
龍隨波騰躍欲變化汎空翻衣光難定使我魄動不
得卧漁人釣徒不知奇鼻息齁齁三山下客見三山
便歸去小舟誰肯月裏過刻詩崖石與遊人欲看島
潭須月夜余在島潭舟中歌此詩使笛人倚而和之

中峯古柳有棲鶻飛鳴衝月而去亦一奇也

三洲在島潭舟

中中夜見月出遂起以舞舟中人有為我言之者

石鐘

余遊山不喜入巖窟中人言風穴多奇觀遊者輒曲躬灌炬而入余蓋三至而不入人言南窟產鍾乳飲者目明又有銅柱金觀音玉馬石廬仙人掌銅壚石牀之屬皆人世所未覩又有江水可以汎舟固勸余一遊而余固不入其後余由島潭登石門崖鑿為峒舟人言中有石鐘考之有音余自峒口而窺之一巨石臃腫若豕腹以杖叩之磴磴然始知風穴南

窟人所稱奇觀者皆不可信類此與諸子一笑題于石門

仙巖

余山水之性與衆異世皆言好山水耶或不允意一泉一石衆人之過而不顧者耶余或欣然甚適古人惟韓退之同余意夫坐茂樹以終日濯清泉而自潔衆人不能言也仙巖固幽窅但石太硯疊壅泉流余甚厭之由丹丘入仙巖道隅自多奇嘗遇兩憇鹿巖大槐下俯見巖底水色清漪有白鷺影蕭散如老道士而不知鷺所在鷺亦不知吾所在而見人影落水

為之一矯不覺發一大笑

舍人巖

舍人巖水淺而湛石少而潔自有留人意

水簾

木石縈鬱巖磴崎嶇輿及五里杖及五里欲退惜前功欲進無餘力忽于林表峭崖得一瀑甚奇遊者至此皆以為得水簾而喜之然水簾距此尚有百步遠可名之曰疑瀑月嶽洞中記

余坐水簾石室中有詩書壁上曰坐久已忘瀑欲歸但愁雨怪來林中僧衣濕不起去此可與知者言也

月嶽峯頂記

門巖記

繇陶谷少西舍玉流之逕以右并鬼園之陌以左得
茅茨一落山中人曰黔石又左落而得溪循溪入水
泚泚益響縈以白石石有若槽焉若伏甃焉率然焉
蓋五步十步以間輒獲一匯一激焉余濯纓而樂之
據膝為孺子歌子業和之顧此丘曰而且為我謳哉
兩袖子趨而前曰山明水湛悅可衆心勝千樹梅檀
香默公曰捨我槁木形為君膝上琴借君一瓶麴米
水澆我死灰心余啞然曰酒之我酒之我少前逕蓋

磽直水洛之陰而獲門巖焉翠崖雙聳為二隼之軼
翼而起者鉅石礮其角斫甚中洞為關淡淡見天色
飛泉掠崖首以厖穿空擲崖南既雪沱雷鳴矣又小
淵以受之蜿蜿其虹飲焉泉之支淵之汎舉迤邐入
前溪以遊草木雲靄咸以影歸之漣漣若秋空甚幽
觀也或曰清寒子所釣遊也

壯節申公祠記

夫傳人之事舉其可信者而其不傳者可推而知也
傳其可疑者而其已傳者皆可疑而不見信也如伍
子胥關壽侯及高麗壯節申公其大節固已信乎萬

世而後之人往往為可疑之說以亂之余甚悶焉公諱崇謙其先谷城人梁貞明中為王太祖騎將太祖甚任之及太祖破弓裔立為高麗王策諸將功推公為第一公勇而善射貌甚類太祖從太祖獵平州有二鴈掠馬首以飛太祖馬驚太祖顧諸將公進曰臣請射之太祖喜錫以弓矢且曰而其右鴈而左翼哉公應聲射落其右鴈矢在左翼矣太祖大歡之命以平州為公鄉世食鴈傍田三百結子孫遂為平州人唐天成二年百濟王甄萱入新羅殺景哀王太祖聞之怒出精兵五千使公將邀萱于大丘之公山大戰

不利營兵圍太祖急公乘太祖車力戰死于陣上將
軍金樂亦死營截公首傳示軍中以為得王故解圍
去太祖遂馳歸軍使人取公屍刻木為首以葬之公
左足有七黑子太師庾黔弼常竒之此其本末甚著
而不可誣者也又按公行狀太祖設八關會與群臣
飲酒酣太祖獨悲思公泣數行下命左右結草為人
像公及金樂坐上座賜之酒酒輒盡既而公與樂皆
起舞左右皆泣自此每宴必設此二像以為常及睿
宗宴群臣西都有二將軍紫衣執笏乘馬馳于庭睿
宗怪問之左右曰此乃太祖功臣申崇謙金樂者也

王為之歎息問二臣之後有存者乎有司以樂孫甲公玄孫勁聞皆名見賜帛此其妖妄之甚不足信者也凡言神恠如鄭之伯有者古亦有之然必皆其人兇虐強死而無歸托於物而為厲者也若公之賢生為忠臣死當為明鬼安有致其鬼於人主之側飲食跳踉者哉余意太祖悲公之死每宴群臣輒為之悲哀不樂故左右結草為公虛其中而寘人焉後世因之以為戲烏稱神哉烏稱神哉而近世名儒不深究其理而徑信其說為別傳以徵之余甚惑焉為述其祠記以辨之

淨白記

淨方之云原天竺之書蓋聞諸佛者佛有十方淨界
夸我至其據迢遞含清虛盡山水之奇則為不負其
稱云乙卯四月丙寅余以四載及焉乘舟自府東門
泝二灘曰文殊彌勒于沙彌灘棄舟而馬或曰艙中
人且叅禪我艙底皆佛矣艙底方言水云并東岡之
崎以左抵桃花谷口愛溪水清漣不能去皆下馬各
據一白石使君瞻鼓琴琴聲益清遠瞻曰余之工乎
哉殆有假而清乎余曰夫孰非假哉水之潔石之假
琴又假水而清子假手而吾假耳爾酒一行乃起石

磴益高下先後人相拮擗以進至下方極樓崩不受
人有二槐樹臨流送清飈為肅客者自此棄馬而輿
徑趨上方人愈高徑愈繞往往崖落不受趾又棄輿
取山僧麻屨任藤條援捷盤繞者未窮而反以睇則
上方出其右蓋猶攀喬木而窺鵲巢焉上方之陰為
鐵壁數十丈厥袤百步辟之髻穹窿為猛獸而攫者
掠薨焉有泉食其趾三直東臺曰東泉直西臺曰西
泉僧言泉水得秋風則幻色為薇花黃云中焉曰中
泉東臺以古柏勝羅衲子之植也鸛鶴之飛腰焉而
不肩蓋其崇不可以丈西臺以江色勝夫憑高皆江

色也獨專以不迫曠而不迂澹澹若園亭之有池沼
則西臺之觀為然茲其為勝也有石中臺卧淨甚小
松以陰之呼君瞻彈琴其上作步虛辭余和之歌歌
已少前窺絕壑余曰暫乎石乎如飛瀑其上當益奇
也瞻曰子盍觀於白雲洞乎耳言白雲之瀑甚壯子
競趨而前曰吾子知水之瀑又惡知石之為瀑乎輒
董官從若家僮撥巨石巖洞中轉以下崖脊聲砢砢
雷發遇航輒激薄對崖又反激射林木電散而雨驟
矣舉始以駭終以怡敏競之能出奇張人也是夜觀
山燒山燒晝則迺烟不見火夜則迺火不見烟時無

月紫焰益晃曜汎濫東北諸峯甚可壯也丁卯曉大霧純沉遠近峯岫縱目以窮之茫乎無一物丈房一燈耿然磬音縹緲與晨泉會一一來枕間少焉日出霽霽者寢縮而不能既不耐日為益盪然徃徃見如馬者如浴鳬之首者是遊也余實躡家大人後徐寢郎命維李生元泰琴者瞻也俞生彥儒俞生盛基為石瀑者兢也少弟敬歌者金萬彥俱府人以糶事告家大人以遊者之半之府余挾二俞暨瞻遷以白雲焉取菱江之蹊馬首少東則得江少西輒得谷如是可二十里而及洞一老父藩焉問焉曰瀑其毋旱乎

我曰迺迺以厓之湫之名能早此縮十四五夫瀑湫
之自出而安得水平乎二子聞愕然爭咎瞻蓋夸瀑自
瞻口而是來為瞻決也瞻殊不堪曰第踵我我又木
石行累十武而至蒼壁之下獲焉二子相視色揚瞻
亦得得焉余笑曰智哉向之老父也吾氣銳來以是
涓涓者烏以充其銳乎謂其必無而後獲也故瀑雖
微猶能敵夫壯而令吾樂也智哉向之老父也登龍
湫觀神馬臨北厓上雷山人言湫中有物白鬣非龍
也蓋馬云題石而歸

月沙李文忠公家藏史書記 丁巳

皇皇王府之章而天子之以為錫是書也非可與外
國人為賭而充一朝之譴者也熊御史之施之也輕
李文忠之取之也泰衆人惑焉達者信之嗟夫天下
大棋局也華夷一史筆也翻覆轉移之機實有不知
為而為者此不可與不知者言也

於神宗皇帝者也月以朝京時
與御史圍碁以書為賭而取之

史書即宋元綱目
而熊御史化受賜

曰自五胡而為宋自宋而為元繼乎元者誰歟此天
地間已具之宋元史而陰陽之一終始也自元而為
明自明而為今日繼乎今者又誰歟此天地間未具
之宋元史而又陰陽之一終始也吾謂是書雖微猶

是以起天下義士之心第抱而俟之我丁巳三月二十
十五日記

李文忠公古梅記

熊御史既以天子所賜宋元書歸李文忠又輟卧內
一古梅以副之其種大播于湖西至于今不絕 崇
禎後再丙辰有好事者為致一本於文忠嗣孫判院
公家於是書與梅離二百年而復合矣余乃拜手而
為之記曰嗚呼江南草澤之中庶幾有 顯皇帝雲
孫也不乎丁巳三月二十五日書

南窟石壁記

庚申

幽昧非君子之觀峻拔發奇士之趣庚申秋日乘小舟入南窟遂題其石

安邊府香雪軒重修記

庚辰

記昔丙寅吾友金稚明出宰安邊遺余書曰吾先祖仙源公宣廟末忤當路出補是府列植梨樹於東軒之北園名其軒曰香雪至今二百餘年而一二故老有食其實者其他開花發葉照映庭墀者皆其種也軒雖廢材尚可用也於是因其舊制而重新之以先祖手書篆額扁焉子盍為我記之余固諾而未就也後十有五年而稚明以玉署長言事忤旨遠配

海島尋又量移長城余亦不安于朝乞外得是府而稚明馳尺素越重嶺復申前托嗚呼蜀之人思武侯之忠則愛其廟前之古栢南國之人思名伯之德則愛其所憩之甘棠況以公之精忠大節實有邦人百世之思而是樹也又其手自培植焉其為人愛惜而勿之剪拜者謂有異於栢與棠者乎今夫公侯貴遊之家奇樹嘉實不知其幾種往來而玩賞者不知其幾人也芳華一歇同歸於塵土豈若茲樹之生乎關嶺荒寒之鄉而寸根尺枝必為地主之所封植一盛一衰皆入邦人之所咏歎者乎余外先祖孝簡沈

公之宰是府也清陰金文正公贈以詩曰憑君有意
封嘉樹莫忘前人手種時至今鏤板在壁間後來君
子誦其詩而思其人不廢修飾之功則香雪之號將
與文忠之名流芳於無窮而永為一邑之美談雅明
之求余記文意亦在斯乎意亦在斯乎遂樂為之言

三朝御墨記

乙酉

右帖十五幅乃我先王三朝御墨也夫河洛之經
緯奎壁之煇耀愚智之所共覩而將使之形容之詠
歌之則舉歆然自知其不能也雖然觀於點畫之端
粹以推測聖學之所至觀於法度之雅淳以彷彿

國風之所漸則茲雖遊藝之一事可以究 三朝出
治之本而寓百世臣民之思矣於戲休哉是帖也今
右揆金公得於其外氏而寶藏焉猥託有容記之臣
竊嘗誦蘇軾御書記曰抱烏號之弓不若藏此筆保
曲阜之履不若傳此書或儲之名山或流於四方凡
見此者皆當聳然以作相與勉為忠厚而耻為浮薄
臣亦謂 三后在天片墨出世文精武思之融液於
毫墨錯落於綃素者莊嚴如袞冕典則如藝鼎潤之
為雨露奮之為雷風手展目擊之間穆然若和氣應
而邪志禁茲其為 聖人之心畫也歟善觀是帖者

能以是求之則我先王所以神明厥德者庶幾仰
測其萬一矣遂拜手稽首敬題

雷淵集卷之十四

